

123

TAM BONO, INDULGENTI,
CONSTANTI PATRONO
DOMINOQVE MEO,
ILLUSTRI, MAGNIFICO, NOBILISSIMO
DOMINO
GEORGIO
HÜBENERO,

Sacræ Regiæ Majestatis Poloniarum Burggrabio, Reipubl. Tho-
runensis Pro-Consuli Seniori, Gymnasij Proto-
Scholarchæ, laude majori,

*A. D. 1700. Ætatis 72. Novembr. 11. Supremum diem explenti,
ejusdemque 21. in Avito Mausoleo, in Spem Resurrectionis
contumulato, ultimo Stirpis suæ Viro,*

H A N C


Pro Annorum aliquot Benevolentia, Consilij, Beneficijs, Auxilijs,

NON FICTARVM LACRYMARVM

A M P U L L A M,

nec sine sensu doloris,

Ego JOHANNES REZIK Gymnas. Thorunensis Pro-
fessor Publ. & Visitator, reddo.



Thorunij in Typographia Magnifici & Nobilissimi Senatus.



Fingimus ambiguus quàm sæpe poemata pennis.
Mentimur lacrymas, fletus, gestuque dolores
Immodicos testamur, & ora in mille figuras
Vertimus, & tremulas formamus voce querelas
Fluctibus abrepti veluti nimijque doloris
Æstibus, in mortem vibramus tela, furores
Illius impetimus verborum pondere magno;
Cum tamen immensas & mens & pectora gestent
Lætities. Calamo Vatis non semper habenda
Fronti & nulla Fides. Fugiat vesana libido
Exitijque parens simulatio fronte dolorem
Ostentare docens & amicum fingere vultum.
Cor, animus, calamus, versus, meditatio, vires,
Ingenium, lacrymæ, mea quicquid corporis umbra
Continet, unius sint tanto in funere sensus,
Hubnerus quando cadit inferturque sepulchro;
Quando animam reddit Cœlis infundit & ossa
Terræ; quando tuos deponit Curia fasces;
Quando tuos linquit Schola mœrens tecta, labores;
Cum linquit natam, neptem dulcemque maritam;
Et me cum linquit fidum promptumque clientem
Hubnerus. Citius spernet Pactolus arenas
Auri quas volvit, contemnet Castora Pollux,
Deferet Æneas languentem ætate parentem
Gurgitibus medijs flammæ quàm mente recedant,
O Hubnere tuum nomen simulacraque vultus
Corporis & facies. Dicam: Sic ora ferebat.
Canities frontem decoravit qualis oloris

Est

Est vertex, sub qua posuerunt Numina sedem
Artis, Consilij validi, cui tradere habenas
Urbs poterat Thoruna suas & divus Apollo.
Tu mihi delapsus fueras velut æthere summo
Patronus, ros ut fusus sitientibus agris
Nubibus, ut messi cœlo delabatur imber
Fertilis, & vires tribuit langventibus herbis;
Sic benefacta mihi tua donavere salutem.
Inclyta me quando, bone Vir, tua tecta tenebant
Quinque annis totidemque integris mensibus, hora
Muneribus mihi nulla tuis effluxit inanis.
Post mortem veneror laudo optatumque parentem,
Qui mihi dux fuerat pulchras Virtutis ut arces
Et artis nossem puer exhaustasque tueri
Has scirem, tamen ignoro cui debeo plura,
Patri an Hübnero? sic consociantur amore,
Cum Patre Patronus mens ut cum corpore fluxo.
Nomine nam solo differt à Patre Patronus,
Non re, non cura, nec amore, favore perenni.
Et Pater & Patronus amat, favet ille tuetur;
Iste favet contra vim fortiter iste tuetur.
Pergama cùm patriæ meditabar ritè vocatus,
Quæis me divorum Magnus Pater atque hominum Rex,
Post varios casus gentis post multa meorum
Funera, labentem voluit quoque ducere vitam.
Tunc redire paras? & amas, ait, impie, flammæ
Bellorum? in domibus clausis penetralibus hostem,
Tela, viros, gladios cernes & inania multa.
Per medios enses, & per discrimina mille
Ibis, perveheris rerum in discrimina mille
Ante oculos stabunt fluitantes ignibus Urbes.

In Patrum nati natorum in sanguine Patres,
Volvuntur. Præstat pacis requiescere lauru
Prussiaca, Attileum quàm lassum quærere Regnum.
Agnovi mentem, venerabar pectus amicum,
Linquo tamen dulcem hanc animam carumque Patronum,
Lechica per nemora & currus & dirigo cursus.
Ite rotæ, dixi, terris Deus ipse quietem
Atque meis ausis, spero, dabit ille salutem.
Ingredior Regnum (gelidus mea concutit ossa
Horror, concrescit nimia formidine sanguis,
Dum memini quæ sum passus quæ dira notavi,)
Reliquias hominum video domuumque ruinam.
Agnosco adveniens paucos, agnoscor & ipse
Vix, quæro vix invenio cunabula gentis.
Patria da stabilem sedem, da mœnia Civi,
Sæpius ingemui ut benè conscia Numina testor.
In vanum cecidere preces patrijque penates
Linqvendi, ambiguo fuerant incerta viarum
Quærenda, impigras extendo ad sidera palmas,
Poscens auxilium, mala pandens ordine certo
Cessero nî fati. Date currus, littora, ventos,
Numina sancta, rogo, fugienti ostendite metam.
Desero Pannonicos fines curruque relicto,
Vita data est Ventis rate disseco fluminis undas.
Per nimbos hyemêque feror, mox gurgite vasto
Jactor, densatis vestitur nubibus ignis
Solis, lux cessit sylvas nox occupat atra.
Accessi tandem meliori fidere ductus
Prussiacas terras dilecta & tecta Patroni,
Quem vidisse satis fuerat. Spes fessa revixit.
Hunc compello Virum, nostros cognoscere casus

Per-

Percupit attonitus: Quis te Deus intulit urbi?
Quærit, pertexo dejecto singula vultu.
Eccur celarem perspecti certus amoris?
Excipit afflictum lacrymans propè: Collige mentem.
Sat tibi sit, dixit, tantos vicisse labores.
His iterum poteris salvus confidere terris.
Te capiet rursus pia Prussia, certa laborum
Hic requies fuerit nos inter pacis alumnos.
Excepit reducem veluti solet obvia puppis,
Sæpe virum vastis jactatum fluctibus Istri.
Quantos ille animi incerti pacaverit æstus,
Dicere non facile est. Dapibus paterisque levabat,
Protexit, rexit, digna statione locavit.
Contudit insultus tumidos avidumque nocendi
Repressit fastum, docuit submittere sensus,
Qui nec ferre pares poterant nec frena volebant,
Prudenti illius semper sermone movebar,
Causas explicuit quando rerumque recessus,
Fortunamque suam, discendi pectoris ignes,
Quos vidit populos quos audivitque Magistros
Gymnasio patrio, vel ab hoc summotus in oris
Belgarum, vel qua desertus vixerit arte,
Quando Sarmatiæ Regnis fera bella tonabant.
Quantos tum Juvenes vicit dum voce Cathedras
Orando implevit Franceræ Laurea dignus
Est habitus. Fuerat tam felix gloria lingvæ,
Ut Patres Urbis, Musarum, Rhetora nostrum
Cernere percuperent & ab illo discere gestus,
Dicendique modos. Senium testatur abunde
Quis fuerit, quantus fuerit, quando ora resolvit
Orator, pariter testatur Epistola docti
Schultzi, quem Gedanum, Francfurt & scripta loquuntur.

Do tibi, Lector, illam. Ita enim Vir Excellentissimus Dn. Iohannes Schultze, J. U. D. A. 1696. Mense Februar. ad Nostrum.

Illustris & Magnifice Domine.

EXpleri tandem passus es, avarum & penè inexplabile Orbis Literati desiderium, sermone inaugurali Tuo, publicæ jam luci dato. Mirantur omnes eximiam tuam dicendi facultatem, qua ita præ cæteris emines, ut non tantum Tui Ordinis, sed & O-ratorum facile Princeps audias. Quantam vim esse oportet, quæ inter obstantia erumpit. Eam certè vim Eloquentiæ Tuæ agnos-cunt vel æmuli artis istius, ut ab invitis applausum extorserit. Neminem verò tam arrogantis nostræ ætate supercilij fore autumo, qui Tibi præferri aut comparari velle audeat, nisi eadem se dignum censura autumet, qua à Seneca olim notati, qui Ciceroni Cæstium suum præferrent, nisi lapides timerent. Equidem non indiget opus immatissimum privatorum Encomio, cum splendor ejus satis integer sit, & citra alienæ commendationis lumen, plerorumque convincat ac perstringat invidorum oculorum aciem. Nec is mihi ambitio-nis stimulus, ut laudibus tuis cumulum quendam exiguo applau-su meo addi posse præsumam; id enim esset solaribus radijs lumen affundere velle. Indulgebis tamen affectui meritis Tuis licet im-pari, quo in æstimationem Tui, VIR ILLUSTRIS, cum reliqua literatorum turba velut torrente quodam abripior. Sed alieno il-lico utor ad excusandam audaciam, antiqui cujusdam Oratoris præsidio: Si mihi nimirum hoc nomine succenseas, quod Te minus, quàm tua Virtus meretur suspicio ac demiror, omnibus quoque mor-talibus succenseas oportet. Hanc quippe liberioris vocis & cala-mi licentiam, tradita Panegyrim legendi potestate, an cessisti mihi an impressisti potius, cui, ut olim ex Apollinis Lyra:

Saxo sonus ejus inhæsit.

Eloquentiam Tuam, VIR ILLUSTRIS, commendat res antiqua extra Eloquentiam, quo dignus Elogij genere, Orator quidam celeberrimus olim judicatus fuit. Themistium hic verè imitatus es. Is Musas Veneri amico junctas esse consortio ingeniose tradidit; illæ quippè purum & à barbarie sordibus depexum reddunt sermonem; hæc decus & splendorem addit, ut comptus benè ac politus facilius in aures animumque admittatur. Procul alienus ab anxia illa Svada, qua pedantismi affectæ in neclendis verborum nodis operose torquentur. Rem animus tuus primum occupavit, cui delectus verborum sententiarumque nitorem conjunxit. Illam porro Inventionis rarioris promptitudinem, Eloquentiæ præceptis haud debes, quin potius dotes ingenij Tui experientia firmati sponte natæ, iisdem robur ac decus conferunt. Fateor legenti id evenisse mihi, quod olim auditoribus Cassij Severi, quorum illicò nemo non illo dicente timebat, ne desineret. Ast metum absterfit illicò convenientior Tibi laus, vel ipso Scauro judice, debita. Non minus videlicet magnam Virtutem esse, scire desinere, quàm scire dicere. Magnum id continentiae in tanto rerum verborumque apparatu exemplum, imperare sibi posse, ne sermo veluti influxus videatur. Eadem ergò & exempli Tui, VIR MAGNIFICE, sequela, licet impare gressu, ductus scribendi licentia, terminum figo. Prolixiori verò sensu me profiteor esse

Illustris Magnificentiae Vestrae
Addictissimum & humillimum Servum
J. Schultz.

Jam tua non tangam, bone Vir, fortissima facta,
Curia quæ novit Schola quæ reverenter adorat,
Quæ depicta manent in grato pectore Civis.

Nec

Nec possum meritis pro tantis reddere grates
Muneribus, fateor, servusque Cliensque paratus.
Vivorum donec fragili regione morabor,
Te decus ætherium semper venerabor, amabo.
Præteriens quoties tua Sacra Sepulchra videbo,
Dicam: *Defensor meus hic mea Fulcra quiescunt.*

Dedicatio.

*Admitte hunc animum, placeant Tibi dona Clientis,
Parva licet sint hæc sunt pia dona tamen.
Immensus pontus parvas quoque suscipit undas,
Tu magnus cum sis suscipe parva, rogo.*

Et hoc scire juvat.

Mors Sceptra Fascibus æquat.

ANNO M. DC. LXXIII. Novemb. XI.

SERENISSIMUS REX POLONIÆ

M I C H A E L,

Exuta Mortalitate Animam Cœlo reddidit:

ANNNO M. DCC. Novemb. XI.

Burggravius noster,

Inania Terræ relinquens, Cælum ascendit.

Utrumque utraque dies mæstum vidit & letum.

Felix & eo, quod primus fuerit, qui collatam

Principi gratulabatur Majestatem.

* * * * *

inv. 413112

v. fol 3 adl. 123